

啥物真正有算在內？

Hit 時，有法利賽派 ê 人 kah 經學教師 tùi 耶路撒冷來見耶穌，講：「是 án 怎祢 ê 門徒食飯前無先洗手？Án-ne kám m̄ 是犯 tiòh 咱祖先 ê 傳統？」耶穌應講：「Án 怎 lín 為 tiòh 執守傳統來犯 tiòh 上帝 ê 誠命？（《全民台語聖經》馬太福音 15：1-3）

有一個巡遊 ê 推銷員去到一個鄉村社區，伊 tī 一間田庄店 á 停落來 lim 一杯飲料。當伊看向窗外 ê 時，伊看 tiòh 兩間美麗 ê 教堂 tī 山坪頂面，雖然只有真少人 tòà tī hit 地區。伊對店主講：「既然是 tī 喬治亞州，我確信其中一間是浸信會，另外一間是衛理公會。」M̄-koh, hit-ê 人回答講：「M̄ 是，兩間 lóng 是浸信會。」

「Án-ne, in 中間有啥物無仝？」推銷員講出心內 ê 疑問。

店主回答講：「Tī 神學上有真深 ê 無仝；一個講：『M̄ 是無地獄』，另外一個講：『地獄無 tī hia』！」

Tú 親像耶穌對法利賽派 ê 人強調 ê 仝款，咱 mā 永遠 m̄-thang hiah-nih 沉迷 tī 爭論單一 ê 聖經經節，致使咱 soah 開始尊崇某一 kóa 聖經節，顛倒 m̄ 是 teh 敬拜耶穌基督。強制性 ê 信條 á 是聖經 ê 分析，甚至是 siōng 傑出 ê 學者寫 ê，lóng bē-tàng 取代一個人 kah 萬權能上帝 ê 自由 koh 私人 ê 關係。咱 lóng 會傾向用信條來取代 kah 上帝 ê 關係，án-ne soah 往往 tī 有小 khóa 意見無仝 ê 基督徒之間造成大分裂。

不幸 ê 是，神學 ê 分裂有削弱教會宣教目的 ê 一大部分。絕大部分 ê 宗教新聞是 teh 關心聖經對一 kóa 重要議題 ê 解釋，親像同性戀者 ê 對待方式、死刑、牧師 ê 權柄、信徒皆祭司，以及 cha-bó 人 ê 角色。爭論時常會引起無團結，koh 會妨礙教會重要 ê 宣教。

咱應該放棄爭論 kah 仇恨，顛倒 tiòh tī 「上帝 hiah-nih 疼世間，甚至賞賜獨生 kián, hō 所有信祂 ê 人 bē 沉淪，反 tng 會得 tiòh 永遠 ê 活命。」 ê 基督教基本前提之下，和諧做工。咱 lóng 是通過相信耶穌基督，koh 承諾為真理獻身，chiah 得 tiòh 上帝 ê 救恩，咱 m̄-nā ē-tàng 避免關係地獄 ê 爭論，koh ē-tàng 避免地獄本身。

**祈禱：**仁慈 ê 上主 ah, 求祢幫助我用謙遜 kah 疼 ê 精神去接觸仝信 ê 基督徒，走 chhōe 阮共同 ê 基礎, hō 阮 ē-tàng khiā 做伙來跟 tòe 阮 ê 救主 ê 模範 kah 命令。我 án-ne 懇求是奉祂 ê 聖名。阿們。

(2003.03.09)